

續修陝西省通志稿

第四十五冊

卷八十至八十一

續修陝西通志稿卷八十

人物

列傳七

趙依言字桐廷白水人由貢生選石泉教諭不赴食貧自甘家居授徒講洛閩之學日取諸儒先書尋繹而力行之以是自律亦以是教人洛宜知名士多從之遊而鄉人梁炳字清潤者亦以講程朱之學聞雖明經家赤貧四壁徒立坦坦如也然更有貧不能自存藉傭錢以購書劬學卒以廩貢司訓咸寧教則勤取則廉卒於任莫能歸櫬如侯國璋字信臣者亦冷官中之皎皎者歟

王應龍字雲驤白水諸生一意稽古博極群書尤究心音韻著有十三經集字韻解八卷考核詳明有裨後進慨窮家子弟失學倡立義塾以教寒畯里人賴之

梁春華字秋丞白水人幼聰慧工詩翰道光甲辰登賢書主講鄜州彭衙各書院訓士先器識而後文藝一從之遊如木遇繩如璞遇玉人如百果草木得甘澍也著實齋文稿二卷杏香齋詩集一卷同里楊方字鑑塘嗜學工文道光癸卯舉於鄉一再赴春官不第遂絕意仕進操行介介不追逐時好不苟取與不矯飾以弋名譽人或譏之以硜硜且自懼弗爲硜硜也

並府縣志
採訪冊

王維一號薪齋華州

今改縣

人乾隆甲戌明通榜授教授旋以知縣

改官江西歷任建昌上饒等縣知縣尋擢知府所至有聲其在建昌懲盜賊治豪猾民困大蘇社倉額久虧官民交累維一捐廉俸實之害乃已建有溺女俗又爲設育嬰堂收活之陋俗頓革歲大旱禱雨立應其在上饒袁某謀詐富翁財未遂殺其姑子誣之案上爲臬司所駁覆鞠卒如縣讞久之丁母憂服闋改安徽會徽州

屬縣因刦盜戕主案株累無辜數十家檄維一往勘卒得正犯論抵餘盡釋之以最擢權徽州府篆陞見改授貴州銅仁府知府溫旨諭以貴州邊地人尙老成可一往抵任查囹圄見群苗數十蹲伏土室中蓋一苗犯事緝捕未獲則票拘村鄰富苗囚辱之以索賄維一痛懲其役而釋諸苗苗性愚前官恒苦役之惟一感以恩苗皆悅相戒不犯法及去跪送江邊者數千人若崩厥角稽首游宦數十年貧如初父早喪事母至孝母歿遇生忌辰輒嗚咽年八十卒

張維瀚字恬齋華州西田村人西田村自昔多衣冠族維瀚與兄維鼎尤負時譽維鼎教授鄉里維瀚綜理家政一遵古禮嘗謂喪爲大事祭乃報本師無當於五服五服弗得不親居家遇此三事皆內盡其誠外備其物教士以孝弟爲先以讀經爲本凡洒掃賤

勞之役令弟子習之且曰古者小學習其事大學明其理故能道
藝兼賅今世詆讀書人爲無用正由小學不明耳每當夏日冬夜
召諸生環立維瀚旁徵博引衷以己意而一本於理與禮俾各切
己體察說經經聽者忘倦道咸之際海疆多故口口旣阻兵南
方渭南北回漢械鬥復連歲不休遠近洶洶旦夕且大亂維瀚觀
時事日昃輒慷慨泣下或召同學痛飲飲輒醉醉則狂歌見者咸
莫測及回變起民爭逃匿維瀚慨然曰吾忝爲鄉貢不能殺賊可
向草間求活耶賊至家人勸之走弗聽之先人墓自戕事聞贈雲
騎尉世職媳王氏聞翁引決亦投井死子璐生員有學行光緒丁
丑大飢不干人亦以餓終

史茂字君躋華州人髫年敦敏出語驚人雍正癸卯舉於鄉次年
成進士以知縣分山西初知河曲縣減牛壩之金免天橋之魚民

頌德焉西陲用兵自京運馬四萬五千每起三千匹從縣沙泉驛經過地乏水茂禱於龍神是夜星月皎潔夜半忽報水大至事竣而水復竭人皆異之茂請於上建祠爲文以記其事縣與陝府谷接壤黃甫川有甌脫地兩縣民爭之至破產械鬪終莫結茂往曉諭爲之畫界爭遂息乾隆丙辰行取戶部主事遷郎中擢京畿道監察御史有嚴禁京債短票禁絕上司餽送苛派禁服飾華靡及分廠煮粥等疏旋授太常寺少卿改通政司參議壬午磨勘鄉試卷有陳科場積弊疏尋陞順天府府丞卒年七十有二

王士綦字檢齋華州人乾隆十九年進士由庶吉士散館改部曹歷任刑部員外郎郎中秋審處總辦在部二十餘年持法明允爲長官所倚重以忤大學士和珅屢起屢躓莫竟其用初珅提督九門心腹役某霸佔通州車行民上控士綦判遣戍黑龍江珅家奴

引碧雲寺池水開窖上拈香見之怒甚逮交刑部承審四人多託故去士蔡獨鞫之定讞堂官咋舌將刪減士蔡爭之如議上上切責坤而置某於法士蔡擢江蘇按察使坤曰君遷之速余薦也士蔡不答及公主下嫁坤子又不賀於是坤益恨之而多方擠之去矣士蔡以旗人霸地案受上知召見諭曰得一可用之人甚可喜也逾年升本部右侍郎旋以司官任內檢查失實發新疆効力上嘆可惜者再尋釋回將授侍郎坤奏棄瑕錄用不宜太驟補刑部贖罪處郎中旋授江蘇按察使撫藩以徇庇書吏皆得罪坤奏王士蔡受恩深重於撫藩徇私不早劾爲溺職擬軍臺効力特旨準贖罪授刑部員外郎上復欲擢爲侍郎坤奏已回籍越三年眞乞病旋里矣士蔡長身鶴立與人交恂恂無圭角及執法則屹不可撼而輕重均當有舅告甥夫婦毀母墓者官擬夫婦凌遲士蔡甫

司臬疑之提訊則甥乃前母子舅乃後母兄也卒平反之時歲久旱案甫結天大雨他如山東辛存義被殺一案旗人某弟婦夜爲人殺一案爰書定矣士棻疑不實均反之世比之于公治獄焉生平平反者數百獄皆足爲治獄者龜鑑又以文章受上知典山西廣西鄉試雲南貴州學政而上所倚重則尤在刑名凡欽差出按外省皆請同行至奉天復州山西徐溝二役則以郎中奉特旨馳驛往均異數也赴江蘇按察任時抵揚州有運判某來見自言前浙江知府也以命案爲公議駁補令職因慕公爲人故欲一見問何以不怨則曰此案失入乃撫軍非知府原判也出辨冤錄一冊則所駁與辨者一一脗合噫豈非淑問如臬陋者歟子志沂號魯泉天機清妙博極群書官員外郎著有陝西志輯要關中漢唐存碑考跋行於世

王志澍號幼海華州人河間知府用鐔子乾隆壬子領鄉薦選藍田教諭教匪擾境設計防堵提督朱勛才之保知縣初選直隸威縣引見調山西靈石革差徭積弊禽巨寇劉常祿李世洪等置於法修汾隄若干丈任靈石八年頌聲洋溢代理霍州遷絳州擢知府知大同太原等府事旋簡四川川東道陞見宣宗以操守清廉嘉之未幾轉山西冀寧道三權按察使司篆坐太谷白石案左遷遂以病免歸主豐登書院講席成就甚多初志澍始祖達在明時曾牧霍州二世祖榮誥判大同高祖帷籌知祁縣歷世循聲均著山右一時傳衣冠盛事志澍繩繼績效愈白縉紳尤嘖嘖樂道云志澍工書法爲時所重著有王虛舟論書賸稿

張德標字望齋華州人父龍川由乾隆丁卯舉人官濟源縣知縣以襄辦金川軍事積勞卒贈道銜蔭一子即德標引見以知縣用

任浙江瑞安縣在官不擾民不縱役有慈父母之稱三載治行課最調永嘉永溫州首邑海墘潮溼廟學頽圯德標捐俸爲倡棟宇一新人文蔚起永每歲有平糶法名爲利民其實官吏因緣爲奸德標至立革之嘉慶丙辰秋颶風大作壞廬舍無算按戶核賑無漏無冒哀鴻得所治永四稔回原任行之日瑞之民竹馬來迎永之民臥轍不起一時閭閻溢郭傳爲盛事好事者繪圖記之題詠幾遍今其圖尙存曾孫學鈞家

段琳字岷生華州人少受業於鄭柏崖學求實際抗希程朱咸豐乙卯中副車同治庚午與弟理同登賢書謝麐伯督學山西聘琳襄校所拔多知名士閭敬銘爲東撫復召主奏章久之以大挑選鳳縣訓導兼主講漢南書院從游者多知名士琳學品旣純尤慷慨好義華州差徭久爲弊叢光緒初每石糧加差錢至三十餘緡

控懇屢屢一不之減時敬銘居河東琳往面陳其弊即據以入奏
遂減山陝差徭十之七兩省士民至今頌敬銘不置而不知實琳
發之也二華水災病民滋甚琳官鳳縣學時以事謁藩司陳三策
謂驛路北有隋唐漕渠故道地窪下宜開舊渠使水東入河則患
止策之上也次開小渠入渭下則常疏沙河台司避之以費絀卒
從中下策至今二華食其利琳素貧布衣疏食子姪讀書應試費
不少客常舉薛文清學行以厲羣從晚嗜文選眉批旁注朱墨並
施其生平劬學至老不衰如此卒後祀鄉賢祠

段瑩字焯生岷生仲弟咸豐辛酉拔貢乙亥舉人考取八旗官學
教習補鑲黃旗官學教習秩滿以知縣分四川久居讞局多所平
反歷任洪雅新繁等縣署天全州敬教勸學人材淳興水利農田
悉心營治蜀俗健訟多盜所莅之地既勤且嚴良感暴戢冤獄獲

仲訟習漸革而盜風亦少熄新繁巨盜黃老么闔境苦之甫下車
即僞爲日者隻身之鄉陽與交驩盜不疑出所刼多物相夸耀既
得實詰旦出不意縛之遠近皆額手頌神明焉官洪雅時有行苞
苴者嚴拒之新繁多堰功所在修完民利甚溥縣民劉黃氏以有
外遇毒死前室子並逐前室女女控縣前令匿奸賄結瑩訊而平
反之爲女擇配治姦如律瑩博學工書能詩官蜀二十餘年口碑
載道卒於天全身後依然寒素焉

段理字燮堂岷生異母弟也性孝友年十二補博士弟子爲文嶄
嶄不落恒蹊州牧王舜臣奇之語人曰他日聳壑昂巖能解吾民
冤苦者即段生也同治庚午登賢書光緒丙子成進士授刑部主
事刑部爲全國刑名總滙檔案山積諸司苦繙閱書吏或因緣爲
奸會長安趙尙書舒翹爲提牢廳理與遊處昕夕研繹盡得要領

每有大獄及直省題奏要犯堂官輒一以委之寓慎於勤讞鞠明
允常謂子姓曰廷尉者天下之平也少有瞻徇心不平矣又何以
平刑政而孚四海乎時長安薛尚書允升官刑部久知理之能屬
以定讞尚書每稱善旋轉員外郎遷郎中記名道府簡有日矣竟
一病不起子五大亨庠生大貞由進士官內閣中書改四川同知
知金堂縣大進甘肅知縣大經宣統己酉優貢大信拔貢京師師
範畢業生

鄭士蕙字芸若華州人家貧嗜學膏油乏時嘗映月光以照讀而
志氣不少灰既自劬學復督課諸弟皆成材群季俊秀鄉邦稱之
士蕙以道光乙亥舉人成丁未進士歷任直隸新城天津靜海等
縣知縣 惲清廉善折獄訟所至除秕事戢虎役留心庠膠勤課
優獎士子奮然各淬於學如春風過寥廓之野而百卉群植皆渟

興也故民有青天之呼去之日臥轍攀轅如康熙時諸循良去位故事尋遷保定同知晉知府以老辭督修靜海保定天津各志著有飲冰書屋文集仕宦三十餘年游至太守比歸里則四壁蕭然殘書數卷而已

鄭芾南字季棠華州人五寨典史士薰子也由太學生選州判補直隸武清丞丞駐楊村雖受民訟甚稀簡芾南以廉明善斷案無積牘民咸便之訟獄者不之縣而之丞縣之訟庭常闐無人制府李鴻章過境廉其才招之去令司文牘時制府兼北洋通商大臣事務浩繁每諮商要政陳對多中機宜鴻章深倚之出常託乘後車以備顧問居府中十餘年從未授以外職以績保直隸州知州加知府銜年三十有八以卒論者惜之著有時務瑣言多中窾會

王宏學字而時華陰人明兵部侍郎之良長子天資粹純好學篤行履規蹈矩深得濂洛關閩之學賊陷長安遂隱居益博覽經史手鈔成帙著有孔時圖達天說九章石渠閣文集弟宏嘉亦山居讀書終身高隱學守兼厲人稱雲隱先生所著手蓉閣名流多題咏焉見關學編

王宏撰字文修亦字無異號山史華陰人亦之良子少與兄宏學宏嘉自爲師友穎奇儁朗風儀秀整從侍京邸有翩翩公子之目少司馬授以制科文匪所好也私鈔左國史漢及歷代詩古文辭沈酣而寢饋之故爲文韻高味遠翛然出塵汪琬稱其得史遷遺意家既豐贍性復瀟曠與當時諸名流遊花晨月夕携杯榼偕良朋倚石臨流徵奇鬪韻風流儒雅見者謂烏衣諸俊好音未泯即宏撰亦自謂吾家螭虎法護不我過也國變以後歛華崇實博極

群書而尤深於易於華下築讀易廬居之其論易闢焦京之術闡周文之理推本經義一以朱子邵子爲歸自經喪亂決志正學究心濂洛關閩之書而躬踐之嘗以周子無極之說陸九淵爭之於前朱子格物之說王守仁軋之於後竊謂格物當以朱子所注爲正無極則以陸九淵所辨爲是又謂陽明之定論不敢以爲定篁墩之道一不敢以爲一即陳建之通論亦間有已甚之辭學者爲學宜平心靜氣吾所最尊之人有一失不必爲之掩吾所深排之人有一得不必爲之廢本諸天地之理證諸聖賢之經傳反之吾心求其是而已矣先是李自成破潼關而西賊騎充斥焚劫騷然宏撰奉祖母與母避居山谷未幾全陝陷逆闖籍繫縉紳考索金帛宏撰家在籍中兄弟畏不敢出宏撰曰不出禍立至矣遂挺身入長安賊營說以大義慷慨激昂賊不能屈亦不肯加刃詭與約

輸而還屏居小漲村之別墅初與李因篤不相識一日邂逅長安茶肆各以意擬姓名詢之皆然遂定交焉順治七年土寇竊發遺賫標掠殆盡乃縱遊之淮陰抵建康至吳門與江左高士留連詩酒越歲歸副使湯斌造廬訂交賈中丞漢復聘修陝西通志并命子婿受業中丞入都邀之偕旋里後結茅華下所與昕夕切劘者朝邑王建常李楷盤屋李顥富平李因篤華州東蔭商渭南南廷鉉皆關中名流而岷山顧炎武入關來訪宏撰分宅館之蓋一時碩儒偉彥萃集華下者咸以宏撰爲居停焉康熙十七年以博學鴻詞徵累辭弗許至都堅臥昊天寺不赴試不履顯者之門大學士益都馮溥左都御史魏象樞均雅重其品藝介人求文而司寇新城王士正編修長洲汪琬侍講宣城施閏章等莫不單車就舍把臂訂交病愈即返其後再爲江南之遊十年而歸歸而息老於